

EGUN ON MAITECHO.

Egun sentiyan eguzkiyaren
 Irteerakin esnatu,
 Eta gaur zure eguna dala
 Bertatik zait gogoratu;
 Pozturik diot egunariai
 Orri ederra jiratu,
 Zure eguna, nere maitia,
 Anchen det argi billatu.

Ustez ederki irakurririk
 Asi naiz izkribatutzen,
 Egun onak nik zuri emanaz
 Chit guchi det utsegiten;
 Baratzachoan ibilli naiz ni
 Lore onak aukeratzen,
 Sorta pollit bat maitecho, zure
 Eskuetao egiten.

Nai nuben bada zu bezelako
 Loria nonbait ikusi,
 Desio orrek eraman nau gaur
 Baratzachora lenbizi;
 Bañan laster det zure berdiñik
 Izango ez dala etsi,
 Eta bertatik, lan bide orri
 Penatuaz diot utzi.

Gaur emeretzi urte dirade
 Sortu ziñala mundura,
 Orduanchen zan zure arnacho
 Sartu zurekin Zerura;
 Baderizkiot izango zala
 Chit egun aundiya ura,
 Zergatik zuben lore ederrez
 Ipiñi jantziya lurra.

Artzen dituen bezela kolkak
 Chitochuak egopian,
 Ala artutzen zinduen amak
 Aur ederra magalian,
 Lo eraginta jartzen zinduen
 Seaskan bere aurrian,
 Ta choraturik gelditutzen zan
 Zu orrela ikustian.

Orañ utzirik alde batera
 Orduko oroitzkizuna,
 Eska zayogun Jaungoikuari
 Bear degun osasuna;
 Ta gaur bezela igarotzea
 Urte askoan eguna,
 Biotzetiken desio dizut
 Nere maitecho kutuna.

JUAN IGNAZIO URANGA.